

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA ME 2024

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

LAULAU FONONO TELE 2024-2025



Susuga Melepone Isara FS (Teutupe), Esera Auatama Esera FS (Sui Taitaifono), Tunumoso Soliola Iosia FT (Taitaifono), Dr. Taipisia Leilua FS (Failautusi Aoao)



Nisi au faau'u, Faasaoina Komiti FS & Pologa, matua ma aiga i le Faauuga Faifeau Samoa

FAASINO UPU

- i. O LE LAUGA...2
- ii. I'U MANUIA LE FONO TELE 2024...4
- iii. PEPA O LE FONO TELE...6
- iv. PEPA MO TUPULAGA TALAVOU...9
- v. O LE PEROFETA MULIMULI...12
- vi. NA O AFIOGA E TULEI MAI...14
- vii. ATA O NISI FAIFEAU FAAU'U FS...16

O LE LAUGA

Tusi Faitau: 1 Timoteo 6:11-21
Matua: 1 Timoteo 6: *“Ia o oe, le tagata o le Atua e, ia e sola ese i ia mea; a ia e tausisi atu i le amiotonu, ma le amio Atua, ma le faatuatua, ma le alofa, ma le onosai, ma le agamalu. 12 Ia e tau le taua lelei i la le faatuatua...”*

ManatuAutu: **OLAGA FA'ASO'O (Discipleship)**

O le olaga faasoo, o le olaga na afua mai i le soifuaga o Iesu Keriso, ina ua amataina lana galuega faaola i le lalolagi. Na amata i Kalilaia, ina ua Ia valaauina nisi o le au tautai o le gataifale, ma nisi o tagata lē taualoa, ina ia tuua o latou tiute, ma o latou aiga, a e mulimuli atu ia te Ia, ina ia faia i latou ma faifaiva i tagata. O le valaauina lautele lea o loo faataua ai le galuega tala'i, i lona tulaga aoao tetele faaEkalesia i le lalolagi. O le valaauina e tuua ai e le soo lona aiga, ma lona nuu, a e alu e fai nuu uma lava ma soo. O le tuua o matua ma le aiga, a e mulimuli ina ia fai ma soo o Iesu, o le ave lava lea o le faamuamua a le tagata i le Alii, ma le galuega tala'i o le Tala Lelei, a e faamulimuli ia lava, ma ona manaoga faaletagata. O le finagalo o Iesu i le soo, ina ia faia o ia ma fai faiva i tagata. O lona uiga, o le galuega tala'i o le Tala Lelei, ina ia maua agaga mo le Alii ma Lona malo. O le uiga moni lea, o le olaga faasoo i le vaaiga lautele, i le galuega faaEkalesia i le lalolagi.

Peitai o loo manino foi i le galuega tala'i a Iesu, o le tatau ai ona avea o le tagata ma Ona soo, i totonu lava o lona aiga ma lona nuu. E pei o le tagata na uluitinoina e temoni, na faamaloloina e Iesu. Na faailoa le mana'o o lea tagata i le Alii, i le fia mulimuli ia te Ia e fai mona soo. Peitai na fetalai Iesu, *“19 Alu atu ia oe i lou fale, i lou aiga, ma ia e ta'u atu ia te i latou mea tetele ua faia e le Alii ia te oe, ma lona alofa ia te oe.”* Mareko 5. Ina ua faalogo ma usitai lea soo i le fetalai a le Alii, fai mai e le gata ua faaolaina ai lona aiga, a e ua soo ai aai e fitu o lona itumalo o alu atu ma faailoa atu i ai, le Silisili ese o le Atua fai vavega.

Tasi lea finagalo o Iesu i le valaauina e fai ma soo. Ia amata i lou aiga, ma lau fanau, le galuega faaola o le Tala Lelei. Ia amata ai iina, ona a'oa'oina le Tala Lelei a le Atua, ina ia tupu tele, ma susulu, ma faamalamalamaina ai tagata e toatele. O lona uiga i le finagalo o Iesu i le olaga faasoo, e le faapitoa na o le faifeau ma perofeta, po o i latou e mautofi i le Ekalesia, a o i latou uma o i ai le faatuatua e mulimuli ai, e faatino le finagalo o le Atua ma le loto usiuitai.

O le olaga faasoo lea na faamalosia atu ai le toeaina o Paulo i lona atalii faaleagaga o Timoteo, a o feagai ai ma le galuega folafola o le Tala Lelei i Efeso. O le nuu o ituaiga tagata eseese, ma le tele o tapuaiga faapaupau. O le nuu o le 'oa ma le tamaoiga, a e 'ai filofilo ai foi ma le amiotelega, ma le ola agasala. A e fai mai Paulo i lona atalii, *“A o oe, le tagata o le Atua e, ia e sola ese i ia mea, a ia e tausisi atu i le amiotonu, ma le amio Atua, ma le faatuatua, ma le alofa, ma le onosai, ma le agamalū.”* O auupega faaleagaga ia e mafai ai ona manumalo mai le tele o faigata, o loo lu'itauina lona ola molimau i le Tala Lelei. Ia tau le taua lelei i la le faatuatua, tago atu i le ola faavavau, na valaauina ai o ia.

O le mataupu lenei e 6 o le Tusi Muamua ia Timoteo, o loo faamatalaina ai e Paulo ni vaaiga se lua o le olaga faasoo. Muamua, o le ata i le feagai ai o le pologa ma lona matai. E leai se saolotoga e mafai ai e le pologa, ona lē usitaia le finagalo o le matai. O le tiute lava lea o le pologa po o le auauna. E faalogo ma usitai i lona matai i mea uma. E faapena le ola faasoo i le feagai ai ma le Alii. E lē tatau ona faia sona saolotoga, a ia faia mea uma e tusa ma le finagalo o le Matai.

O lona lua, o le avea ma soo o le Alii, e lē tatau ai i le tagata ona atua i le ‘oa. Na iloa lelei e le aposetolo, o le tasi lea vaivaiga faaEfeso. E tausili lava tagata i le ‘oa ma le tamaoaiga faalelalolagi, a e ama le manatu i le ‘oa faalelagi. O la Paulo ia Timoteo, “6 *A o le amio Atua ma le loto malie, o le oloa tele lava lea. 7 Auā tatou te le’i au mai lava se mea e tasi i le lalolagi, ua mautinoa foi tatou te le mafai ona ave ese ai o se mea. 9 A o e mana’o i le fia mauoa, e maua i latou i le faaosoosoga, ma le mailei, ma tuinanau e tele e valea ai ma leaga ai.*” E lē faapea ua faalēaogāina e le aposetolo le tāua o le ‘oa, e leai; a o le avea o le ‘oa ma ala e galo ai i le tagata le Atua ma isi ona uso a tagata, ona avea lea ma agasala ia te ia.

Peitai o le olaga faasoo moni o le Alii, o le tausisi i le amiotonu, ma le amio Atua, ma le faatuatua, ma le alofa, ma le onosai ma le agamalū. O le olaga faapaiaina lea e mafai ai e le soo ona tago atu i le ola e faavavau. O le ola e faavavau, e lē o le ola umi, po o le ola faifai pea i lenei olaga. A o le ola e faavavau, o le ola ia Keriso. “3 *O le ola faavavau foi lenei, ia latou iloa oe le Atua moni e toatasi, atoa ma le ua e auina mai, o Iesu Keriso lea.*” Ioa.17. O le olaga faasoo, e taumafai ai le tagata e mulimulita’i i le soifuaga o Iesu Keriso, ona mautinoa lea o manuia o le ola nei, ma le ola i tua atu o le oti.

I le fuaiupu 13 ma le 14, o loo toe faamanatu atu ai e Paulo ia Timoteo, le tautinoga a Iesu na faia i luma o Pilato, i le taimi o Lona faamasinoga. O molimau pepelo, na molia ai Iesu e le au ositaulaga sili ma tagata Iutaia i luma o Pilato. A e na tali Iesu ia Pilato, “36 *E le mai le lalolagi nei lo’u malo; afai ana mai le lalolagi nei lo’u malo, po ua tau a’u auauna, ina nei tuuina atu a’u ia Iutaia; a o lenei, e le mai iinei lo’u malo. 37 Ua tali atu Iesu, “O lea lava, o a’u o le Tupu. O le mea lava lenei na fanau mai ai a’u, o le mea foi lenei na ou sau ai i le lalolagi, ina ia ou molimau i le upu moni. O i latou uma lava o i le upu moni, e faalogo mai i latou i lo’u leo.”*Ioa. 18.

O le uiga moni lea, o le olaga faasoo o le Alii. O le tagata e faalogo, ma faalologo i le upu moni a le Atua. O le tagata na te maua le agaga o le pologa, e ava ma usitai ai i lona Matai. O le soo o le Alii, e le atua i le ‘oa, a e tamaoaiga i le

amiotonu, ma le amio Atua ma le faatuatua. O e ua ola ia Keriso.

Le Ekalesia e, o le uiga moni lea o le olaga faasoo. O le olaga e ao ona mulimuli i tulaga aao o le Alii. O le taimi lava tatou te fia muamua ai i luma o le Alii, ona tatou iloa lea, ua matuai tele lava le faaletonu o lo tatou valaauina e fai ma soo. “*A o oe le tagata o le Atua e, ia e sola ese i ia mea. 20 Ia ‘alo’alo ese i upu leaga, ma le lē aogā, ma finauga i mea ua igoa pepelo ai o le iloa; 21 o isi o e na taofi ai, ua sesē ai i latou i le faatuatua*”.

Ioe le fanau e, a le Atua, o lo tatou avea ma soo o le Alii, e ao ona tatou sosola ese i upu leaga ma le lē aogā, ma le pepelo, ona e faaseseina ai le upu moni a le Atua ua totoina i o tatou loto. A o lo tatou ola ia Keriso, tusa po o a tiga tatou te fetaiiai, tatou te tago atu ai i le ola faavavau, ina ua tatou faalologo, ma usiusitai pea i le siufofoga o le Alii, na valaauina i tatou e fai ma soo.

O le fesili faatupu manatu: O a mai le olaga faasoo o le Ekalesia? O tatou faalogo i le Matai Sili, pe ua tauau ina ese ni leo malolosi ua tatou faalogo i ai? A o a mai lo tatou olaga faasoo i totonu o tatou aiga ma nuu, i totonu o lau faigamalo ma lou fale faigaluega, totonu o lau vasega ma lau a’oga? O maua ai ni soo faamaoni o le Alii, i latou o tausisi i le amiotonu ma le alofa ma le faatuatua? O le uiga lea o lo tatou valaauina e le Alii e fai ma soo i lana Ekalesia. O le a le tofi ua valaauina i ai i tatou, ia tatou auauna ai iina ma le faamaoni. Tatou mulimuli ai iina i le Alii ma le loto faatuatua, ina ia mafai ona tatou sosola ese mai le agasala tatou te fano ai. O lo tatou tago atu lava lea i le ola e faavavau, ina ua tatou tau le taua lelei i la le faatuatua ma ola ia Keriso. O le olaga faasoo lea sa faaalii i le soifuaga o Iesu Keriso. Tiga le inosia, o tauemuga ma le tuuaifuaina, aemaise le matuitui o tiga o le satauro, a e na tumau lava o Ia i le upu moni seia oo i le oti, ina ia faia le finagalo o lona Tama, mo le faaolataga o le lalolagi, ina ia tatou maua le ola e faavavau e ala i le salamō ma le faatuatua ia te Ia.

Ia manuia tele le Fono Tele a le Ekalesia i lenei tausaga. Ona o Iesu. Amene.

Saunia susuga Faisiota Autagavaia FS,
EFKS Alafua,
Pulega Faleata Sasa’e,
MATAGALUEGA FALEATA.

I’U MANUIA FONOTELE

“Ana le se anoa le Alii na ia te i tatou, ia faapea atu lava Isaraelu; ..Ia faafetaia le Alii..O le tatou fesoasoani o i le suafa o le Alii lea, o le na faia le lagi atoa ma le lalolagi.” Salamo 124.

FONOTAGA O LE ULUAI VAIASOSA

E ui ina sa tetele timuga i le amataga a o gasolo atu ma faamautu usugafono mai le nofo a Pulega ma Matagaluega i totonu o le Laumua i Malua, a e sa le’i avea o se faafitauli; o le talitonuga masani o uaga o faamanuiaga, o le timu o faailoga vaaia o le Agaga liligi ifo i luga o le Tino vaaia o Keriso le Ao o le Ekalesia. Sa faapea foi ona mautu atu le afioga i le Taitaifono o le Fono Tele, susuga Esera Auatama Esera FS ma le faletua ia Tamara, faapea le Sui Taitaifono susuga Tunumoso Soliola Iosia FT ma le faletua ia Susana, i o latou ofisa ma apitaga e pei ona saunia faapitoa. O le susuga i le Failautusi Aoao, Dr. Taipisia Leilua FS, le Teutupe susuga Melepone Isara FS ma o la faletua ma le Ofisa Tutotonu o le Ekalesia, sa faapea foi ona muamua faamautu mo le saunia o Faila o le Fono Tele ma isi manaoga eseese e tatau ai.

O le Komiti a le Au Toeaina na muamua tatala fonotaga a komiti, faapea le asiasiga a le Komiti Atina’e. E ui ina sa tula’i mai nisi faalavelave i lea taeao, a e faafetai i le alofa o le Atua sa vave togafitia ma faasaoina ai le soifua o le usufono sa aafia. Na taualuga le uluai aso i le Sauniga Lotu a le Au Toeaina, na taitaiina e le susuga Fili Si’a Matalavea FT le Komiti Faatonu o le Matagaluega Malua. Na faasolo fonotaga i le vaiaso a le nofo a komiti, faapea le Mafutaga Tina e pei ona masani ai.

FONO AOAO TUPULAGA EFKS

O le Aso Lulu na tatala aloaia ai le Fono Aoao a Tupulaga, i le sauniga lotu na taitaiina e le susuga Matelili Leaana FT o Niusaelese Sisifo. Mulimuli ane ona faia lea o le Pepa na saunia e le Ofisa Lotofaga Lepa Aleipata i le MAK, susuga Paie Tapu Legalo AM, ma faasolo ai le fonotaga a Tupulaga. O le Fono Aoao Tupulaga na amata aloaia i le 2019. Na taualuga le Aso Lulu i le Lotu Au Tamumafai na taitaiina e le susuga Uikilifi Vaifale FS mai Niusaelese Sisifo. O le Lotu o Nuue Ese na taitai ai Palemia Lafolafo FS o le faafeagaiga EFKS Takanini o le Matagaluega

Manukau, a o le Lotu Au Leoleo na taitai e le susuga Kuatemanu Ulutui FS o le faafeagaiga EFKS Ketesemane o le Matagaluega Laumua o Aotearoa.

FAAU’UGA FS & LOTU TUPULAGA

E to’a 25 A’oa’o na faau’uina i le tofi Faifeau Samoa i le sauniga i le taeao o le Aso Toonai. O i latou nei:

1. Atapana Lau & Victoire Kuiniselani Saute
2. Emani Tevaga & Naitosara Kuiniselani Saute
3. Faafetai Nepo & Tamara Kuiniselani
4. Faasaoina Komiti & Pologa Faasaleleaga
5. Falepau Tuiluga & Caroline Kuiniselani
6. Isaako Jr Iose & Alice Niusaelese
7. Kapeni Matatia & Renolla Apia
8. Kereveta Tiumalu & Faanaitaua Faleata
9. Ketty Iupeli & Vetta Faasaleleaga
10. Konelio Taumaloto & Ioka Malua
11. Lancelotte Alaimoana & Naomi Kuiniselani
12. Loia E. Kolia & Easterakesa Apia
13. Matalapai Laufiso & Pekina Niu Sila Saute
14. Navy Luatua & Amiaifolau Malua
15. Niutuiatua Onesemo & Cecilia Faleata
16. Penehuro Lilomaiava & Feagia’i Kuiniselani i Saute
17. Peniamina P. Toailoa & Felicia Niusaelese
18. Penitala Kolose & Reima Manukau
19. Petaia JA Fuimaono & Daphne Kuiniselani
20. Senetenari Autagavaia & Leono Manukau
21. Silipa Silipa & Tagiilima Faasaleleaga
22. Talamitaki Hasini & Vaitui Laumua Aotearoa
23. Tavita S. Reupena & Logosau Faleata
24. Vauea Esau & Susie Itu o Tane
25. Visesio Leilua & Faapenu Faasaleleaga

O le susuga Tunumoso S. Iosia FT na ta’ita’i, Nomeneta Simanu FT na faitauina le Tusi Paia, Aviti Etuale FT na tatalo, o i latou na faae’e ‘a’ao e faau’u faifeau, o Tunumoso Iosia FT, Asotasi Time FT, Misipalauni Faatau FT, Pouniu Faamausili FT, Fili Matalavea FT ma Makerusa Porotesano FT. O le Failautusi KAT susuga Amuia Seuala FT na faailoa ma tolaulau talaaga o A’oa’o ma Faletua.

LOTU TUPULAGA

O le aoauli na faia ai le Lotu a Tupulaga na taitai e le Toeaina susuga Viliamu Finau FT, o le faafeagaiga EFKS Dandenong o le Matagaluega

Vitoria. O le Feagaiga Tuai na faitau e Tyrone Tauti, a o le Feagaiga Fou o Benjamin Faatoatoa Taai. Tatalo Faafetai na fofogaina e Atalani Faaiuas, Faatoesega o Leahrina Rolagi Koko, a o Manaoga o Susana Siaunuu. Na sosoo ai ma Faafiafiaga matagofie na saunia lelei e tupulaga toatele o lea lava Matagaluega Vitoria. Na faai ai le Aso Toonai ma le uluai vaiaso i le tufatufaina o Faila o le Fono Tele 2024 e le Ofisa Tutotonu o le Ekalesia.

FAAMANATUGA ASO SA PENETEKOSO

Ua pa'u tonu le Aso Penetekoso i le Aso Sa o le Fono Tele o lenei tausaga. O sauniga lotu ma le Sakarameta o le Faamanatuga i le taeao na taitai ai susuga Faatulituli Setu FT i le Fale Iupeli, a o Kereta Fuafiva FT i le Fale o Tina. Sa tolaulauina ai suafa o e ua fai i lagi le folauga. O sauniga lotu o le afiafi na ta'ita'i ai susuga Esaroma Fatilua FS o Aana ma Maaola Sesaroma FS o Aukilani.

AMATALE FONOTELE

O le faasologa masani o le Fono Tele i lona uluai aso, e amata i le tapuaiga sa taitai e le afioga Taitaifono susuga Esera Auatama Esera FS, ma lana saunoaga e faafeiloai aloaia le usugafono o lenei tausaga. Na fai le Tauvalaauga ma Faanoi o usufono ona sosoo lea ma le Pepa na saunia e le Faiaoga Malua Dr. Visessio Saga FS. Ona faagasolo lea o le Fono, i le faamaonia o Iugafono Fono Tele 2023, faapea Iugafono Tumau e tusa ma le Iloiloga lona sefulu ma le tasi sa faia ia Mati o le tausaga nei. O Mau mai Matagaluega ma Mau mai Komiti Tetele a le Ekalesia na sosoo ai. Na fai foi le sauniga faapitoa o le Faailoaina o Tusiga, e aloaia ai nisi o tusi na tusia e Faiaoga Malua.

SAUNIGA O LE AU PENISIONE

O le Aso Lulu na faia ai le sauniga e aloaia ai le Penisione a susuga Toeaina & Faifeau ma o latou Faletua. E toa 11 le aufaigaluega ua ausia le matua o le soifua e agavaa ai mo lenei tulaga (65 tausaga e mafai ai ona penisione pe afai e finagalo ai, a e 70 tausaga e faamalosi ai). O le afioga Taitaifono Fono Tele, susuga Esera Auatama Esera FS na taitai le sauniga mamalu na faatumulia i Aulotu, aemaise o aiga ma aumea a le au penisione, tainane le usugafono o lenei tausaga. O i latou nei ua Penisione i lenei tausaga:

1. Sisigafu'a Bentley FS & Parasaita Hawaii
2. Pepa Taavao FS & Ailini Niusauelese Sisifo
3. Viliamu Chan Fong FS & Kathryn NS Saute
4. Faatulituli Setu FT & Meripa Laumua Aotearoa
5. Oliva Tiai FS Laumua Aotearoa
6. Vaaelua Patu FT Manukau
7. Fiatepa Faee FT & Penina Aukilani
8. Vaigalo Maua FT & Petimara Apia Sasa'e
9. Lauama Fono FS & Elieta Aana
10. Iakina Alefaio FS & Roina Falealili Safata Siumu
11. Susuga Alesana FS & Faasasalu Lotofaga Lepa Aleipata

SAUNIGA MO LE FAAE'ETIA O LE TOFI POROFESA FEAGAIGA FOU.

O le sauniga faapitoa e faae'e ma aloaia ai le faailoga Porofesa o le Feagaiga Fou, o le afioga i le Faifeau Pule o le Kolisi Faafaifeau Malua, susuga Dr. Vaitusi Nofoga FS, na faia lea i le Aso Tofi a e le'i malolo le Fono mo tausiga o le aoauli. O le Taitaifono Komiti o Malua, Asotasi Gu Time FT na ta'ita'i i le sauniga, a o le afioga Taitaifono Fono Tele susuga Esera Auatama Esera FS na saunia talosaga. O le tauaoina atu o le Tofi Porofesa na saunoa ai (i) Failautusi Komiti Au Toeaina, Amuia Seuala FT (ii) Professor Paul Trebilco (Iunivesite Otago) (iii) Professor Otele Perelini FS, o le Faifeau Penisione ma sa avea ma Pule Kolisi Faafaifeau Malua. O i latou na faae atu o latou aao e faae ma faauu le Porofesa, o Tunumoso Iosia FT, Leaso Tupai FT & Tauaaga Mataafa FT.

PALOTA & TAPUNIA ALOAIA

O galuega faai'u o le Fono Tele e aofia ai le faamaonia o Galuega a Komiti e 6 o le tausaga atoa, o le faamaonia o le Paketi, Tala o Faiga Taulaga, faamaonia sui o komiti & Failautusi Matagaluega, sailiga o le Suetusi ua tofia ai Ah Chong Public Accountants. O le palota mo le Teutupe ua toe tulai mai ai le susuga Melepone Isara FS, a o le palota mo le Sui Taitaifono ua toe filifilia ai le susuga Esera Autama Esera FS. Ona suia ai lea o le nofoa o le Taitaifono ina ua seei ai le susuga Tunumoso S. Iosia FT, ma na faia ai le sauniga faai'u ma tapunia aloaia ai le Fono Tele o lenei tausaga. Ua faamalo i le faatofala'iga a le usugafono 2024. Ia viia le Atua o lona alofa ua i'u manuia ai le faamoemoe.

FAAMANAINA E LE AGAGA E ATIA'E LE EKALESLIA A KERISO: ILOAINA O IESU (Sanctified by the Holy Spirit to Build the Church of Christ: Knowing Jesus)

FAATOMUAGA.

E fia fa'aaoga ma auiliili atili e lenei Pepa, le faamoemoe o le taiala o le Fono Tele o lenei tausaga (o ta'ua i luga), aua se sao ia manuvao i le soifua tautua ma le ola fai taulaga o tagata EFKS mo le Atua ma lana Tala Lelei. E lua ni vaega o lenei sailiga, ma o le a aga'i le vaega muamua i le iloiloaina o upu galue o loo i le taiala autu-“faamanaina” (sanctified) ma lona fesootaiga ma le upu “atia'e” (build). O le vaega e lua o lenei pepa, o se aotelega i le fesootaiga ma le mataupu autu o lenei taeao, “*Iloaina o Iesu*”, e pei ona tomatauina ai i tatou e le afioga i le Taitaifono i le tapuaiga amata. O le tuufaatasiga o ia manatu autu e faavae ai lenei sailiga e faapea: “*Faamanaina e le Agaga Paia e Atia'e le Ekalesia a Keriso: Iloaina o Iesu.*”

SAILIILIGA.

Mo le vaega muamua, o se sailiga i le uiga o upu galue o le “faamanaina” ma le “atia'e”, ina ia faapupula atili o la sootaga taua i le auunaga faaEFKS.

Faamanaina (Faapaiaina).

O le upu ‘faamanaina’ ua ou fa'aaogaina e fesootai ma le upu ‘faapaiaina’, e pei ona faaliliuina faaSamoa ai le upu faaPeretania, *sanctify*, po o le faaupuga ‘*to be sanctified*’. A o le upu ‘faapaiaina’ i lona fa'aaogaina i totonu o le Tusi Paia, e fesootai tonu ma le tulaga paia o le Atua.

O lea manatu e faavae mai fetalaiga tuu sa'o a le Atua, ina ua faasaoloto lona nuu mai le pologa i Aikupito, “*Ia paia outou; aua o a'u o le Alii lo outou Atua e paia lava a'u.*” *Levi.19:2*. O lona uiga, o le upu paia, o se tasi o natura o le Atua, ma e faasino ma patino tonu i le Atua lona fa'aaogaina. O le paia lea o le Atua, o soo se vaega lava e fesootai ma lona tulaga Atua e paia lava, e pei o le mana tautoalua o lona Agaga Paia, ma e oo foi i lona suafa, o le suafa e paia (ft. *Levi.20:3; 22:2,32; Isa.29:23; Esek.36:23; Mata.6:9; Lk 1:49, 11:2* ma isi).

O le paia lea o le Atua ua faasafua mai foi i ona tagata, ma ua faapaiaina ai ma le tagata i le va tapuia lea. A o le pito laau a le tagata ua faapaiaina, o le molimau atu lea i le tulaga paia o le Atua, ma o se aupega malosi foi mo le tagata - le suafa paia ma le mana o le Atua, e faatino ai lana auunaga (ft valaauina o Mose *Eso.3:1-22*). A leai la le Atua e paia, po o le paia foi o le Atua, e leai foi se tulaga faapaiaina o le tagata. O le paia lea o le Atua e afua mai ai, ma e faapogai i le ola faapaiaina o le tagata (se nofoaga po o ni mea totino foi) ma le faamoemoe, e faatino ai lona finagalo i soo se vaega o fa'aaoga i ai le soifua ma le ola i le auunaga o loo fai.

O a'oa'oga tupito ia mai Tusi e lima a Mose, aemaise lava i Tusi o le Esoto, Levitiko, Numera ma le Teuteronome (*Books of Law - the Pentateuch*). O loo maioio mai ai le fesootaiga o le paia o le Atua ma foliga vaaia o lona fa'aali mai (*theophany*), ma tulafono o le ola faapaiaina o tagata e tapuai ma auuna ai i le Atua. Ma ua tu matila ai le tulaga o tagata ua faapaiaina, e “*tavavae eseina*” (*separation*) i latou faatasi ma mea totino ua faapitoa mo le auunaga i le Atua, mai le li'o masani o se faapotopotoga o tagata ma meatotino o aso fai soo. Ma e o faatasi lava le faamoemoe lea o le ‘vavae eseina’ o le tagata ua faapaiaina, ma amioga pulea ma aga tausili (amio faaleAtua) ua tatau mo le faatinoina o le galuega (*ethical behaviour*), ina ia iloa atili ai le paia o le Atua i le ola valaauina o le tagata.

O lea sootaga e atagia i le fa'aaogaina o le upu ‘paia’ i totonu o le Tusi Paia, e faamatala ai lea natura o le Atua, ma le tulaga faapaiaina o tagata ua Ia valaauina (faapea i nofoaga ma meatotino) i le va fesootai lea ma le Atua, e pei ona i ai le Kalafa 1. E fesoasoani mai foi le Kalafa 2, i le fa'aaogaina o le upu ‘faapaiaina’ (*sanctify*) e faamatala atili ai lava le sootaga lea. O le Kalafa 1 o loo faailoa mai ai le fa'aaogaina o le upu ‘Holy/holy’ (774 taimi) ma ona uiga eseese, e faamatala ai le natura paia o le Atua, a e faapea foi i le tulaga paia o tagata, nofoaga ma mea totino

i le sootaga ma le Atua. E faapea foi le Kalafa 2 o loo faailoa mai ai le fa'aaogaina o le upu 'sanctify' (65 taimi) e faamatala ai le tulaga faapaiaina o Ositaulaga, nofoaga ma meatotino mo le galuega a le Atua.

Faataitaiga mai le Feagaiga Tuai, i taimi o le faamautuina o le mafutaga a le Atua ma lona nuu filifilia, i le fa'aali mai o le paia o le Atua ma tulafono mo le ola faapaiaina o Isaraelu (Tusi e lima a Mose); faapea foi i taimi o lapataiga ma le faamalosi mai o le Atua, e tauala mai i galuega tauologologo a Perofeta, aua le ola toe fuataina o tagata ina ua toe foi le Tafeaga. Mo le Feagaiga Fou, o loo manino lea sootaga i taimi o le uluai Ekalesia i le faapaiaina o tagata e le Agaga Paia, ma le salalau mai o le Ekalesia i galuega a le au Aposetolo ma le au paia (saints).

O le tulaga e fia faatauaina i lenei vaega o le pepa, o le mafutaga fesootai a le Atua ma tagata ua Ia valaauina e faatino Lona finagalo. O le sootaga e su'i e le paia o le Atua, ma ua fusia faatasi ai le Atua e paia, ma **tagata sa agasala a e ua faapiaina**, e pei ona molimau afioga paia a le Atua i le lavea'iina o Isaraelu mai Aikupito, ma 'faapaiaina' ai i latou mo le Atua (Esoto 19:6). O lea foi le alofa o le Atua i taimi o le Tafeaga, ina ia faatumauina le paia o lona suafa ua mata'uleagaina e le agasala, na ia toe faafoisia ai le Tafeaga mai Papelonia (Eseki.36:21-23;38:16, 23; 39:7, 25-27).

O lea foi le faamoemoe tutasi o le Feagaiga Fou (aemaise i a'oa'oga a Paulo), o le tagata ua faapaiaina e le Atua, e ala i le mana o lona lava Agaga, o le meaalofo lea a le Atua ua suia ai le tagata le talitonu, e fai ma molimau ola mo lana Tala Lelei, i le faatinoga e tatau mo le tagata ua faaolaina (1 Tesa 4:3,7). Le paia atoatoa lea o le Atua ua fa'aalia ia Iesu Keriso, ua faaolaina ma faapaiaina ai le tagata agasala i le suafa paia o le Atua (sanctification). A o aiaiga o le faapaiaina ma le tumau ai i le faaolaina, ia atagia i le faatinoga i amioga e tatau ai, seia oo i le toe afio mai o le Alii o Iesu ma lana faamasinoga (1 Tesa 3:13, Tusi o Fa'aaliga).

O le mafutaga vavalalata lea a le Atua ma ona tagata, ina ua Ia saili mai i le tagata agasala ma

valaauina i tatou i ona manuia, nei ma ielua, e ala i le soifua auauna i le Ekalesia i le galulue faatasi ma le loto gatasitasi (Galu.2:1). O lona uiga, o tagata ua faapaiaina (tagata o le Ekalesia), o le valaauina lava lea e fa'aauau le atia'eina o le galuega a le Atua, ma molimau atu i lona alofa lavea'i. O tagata foi ua faapaiaina, ua valaauina e faatino le finagalo o le Atua i tu ma aga faaleAtua (amio paia) ina ia iloa ai le paia silisili ese o le Atua, i le ola auauna e ati a'e le Ekalesia.

Atia'e, e faamatala e le upu 'molimau'.

Mai le fuaiupu o loo faavae ai le taiala mo le Fono Tele (Galu.1:8) o loo ta'ua ai le upu 'molimau' (*witness, μάρτυρες*). O le uiga masani o le upu 'molimau' ua silafia uma, o le faailoa atu (*proclaim/exhort*), faamaonia (*testify-courts*) faapea le matau (*observe*). Mai ia faauigaga masani, o loo taoto ai le vaai faakerisiano i le va fesootai o tagata i tagata, faapea le sootaga o tagata ma le Atua, a e faapitoa lava i sootaga o tagata ua faapaiaina ma le Atua e paia, e pei ona ta'ua i luga.

O lenei foi upu 'molimau' e tele ina fesootai ma a'oa'oga o le Feagaiga Tuai i le tulaga o se faamasinoga tonu (*judgement*), e faatatau i le 'sa'o' (*truth*) ma le pepelo (*falsify*) o se molimau, faapea ona aulape e tusa ma aiaiga o le tulafono (Teute.19:15) - moomia le lua o molimau; Eso.20:16 - 'Aua e te molimau pepelo). A e mo le au fai Evagelia ma le Feagaiga Fou, o le **soifua** ma le **galuega** a Iesu Keriso, o molimau maumaututu ia o le sa'o atoatoa o le talaiga a le Alii e faatatau i le Malo o le Atua ua oo mai, ma le faaolataga mo tagata agasala.

Mo Mareko, o lona fa'aaogaina o uiga eseese o le 'molimau', e tetee atu ai i tuuaiga sese e faatatau i le Mesia (ft. tuuaiga o Iesu o se vale ma Pelesepuolo, Mare.3:20-30). Mo Mataio, o Iesu o le Atalii o le Tagata ua i ai le pule (*authoritative Son of Man*), e molia ma faamasino i nuu uma, ma auina atu ona soo e fai ma 'molimau' i le lalolagi atoa. Mo Luka, o lana tusi o faamaumauga a molimau sa mafuta faatasi ma Iesu (*original eyewitnesses*), ma o le faavae lea o lana molimau i le faaolataga mo tagata uma (*universal salvation*). Mo Ioane, o le soifua galue o le Alii, o se

faamasinoga i le va o le Mesia a le Atua ma le lalolagi, aemaise o le galuega a molimau, e pei o Ioane le Papatiso, le moni ma faamaoni o molimau a soo. A o le molimau pepelo, o le tetee lava lea i le finagalo o le Atua.

Mo Luka lava ia (le tusitala o Galuega), o le vaega tele o lea molimau faasoo, o le ola faitaulaga e feagai ai le ausoo ma sauaga ma faaososoga (*sacrificial discipleship*). A o le soo ua moni lana molimau, e tumau lana tautinoga i le Atalii o le Tagata ma Lana faaolataga e le faatuaoia lona faamoemoe. O le tumau lea e ono avea ai foi le soo faamaoni, e fai ma molimau fasia i le galuega (maliu faamaturu, *μαρτύριον*) ft. le maliu fasia o Setefano (Galu.6: 5 - 8:2). O soo ua faapaiaina ma faamanaina mo le galuega, latou te faalagolago ma fa'aaoga ai le Agaga Paia o le Atua e fai ma latou molimau, ma e fetalai foi le Agaga Paia e fai ma sui mo i latou (ft. Mare.13:11; Luka 21:13-15).

Mo i tatou le EFKS, o le isi vaega taua i la tatou molimau, o le soifua auuana e atia'e le Ekalesia a Keriso i totonu o le EFKS - le ola faitaulaga. E le fesiligia le soifua tautua o tagata lotu EFKS, pe a silasila i le tamaoaiga sasa'a mai le Atua, ua tatou fa'aaogaina ma le loto faafetai. O loo manuia le faatinoga o galuega ma atina'e eseese. Ua mautu le tele o meatotino e tua i ai le Ekalesia i Samoa, faapea le tele o Aulotu i atunuu mamao, aemaise lava i totonu o Malua nei, i galuega faaleleia ma galuega atia'e o lenei tausaga. O foliga vaaia ia o le tautua matavela mo le Ekalesia a Keriso, e atia'e ai vaega eseese e moomia, i le faatuatua, o i tatou ua valaauina ma faapaiaina e le Atua mo Lana galuega, ma o fua vaaia ia o faamanuiaga mai le Atua.

Peitai, o le tata logo a Masefau ma se tuualalo a le Pepa, ona o i'uleo tuu mumusu, a o se vaega e tatau ona o tatou lagonaina i totonu o aiga, nuu ma le Ekalesia, ona e le tutusa uma tagata. Ua lelei naua le atia'eina i la le tino ma e moomia pea e tusa ma manaoga o lea taimi ma lea taimi, a ia o faatasi foi ma le atia'eina o le itu faaleagaga o tagata lotu. Ia atagia pea le paia o le Atua ma lana amiotonu i a tatou faaiuga fai, ina ia tutusa tagata uma i le atina'eina ma faamanuiaga o le ola auuana. Ia o tatou molimau atu foi ma faatino le ola valaauina i le sa'o atoatoa, a e le o le pepelo, le faafoliga ma le faasausili. Ia tatou

lagonaina i'uleo o fita, ma nisi itutino o le Ekalesia o mafatia, ona o le moni o le utiuti o le faasoa ma o moomia le fesoasoani, e pei ona faatino e le Alii i lana galuega laveai. O le taiala lea e ogatotonu ai Keriso i le soifua tautua a le EFKS, ma o lo tatou iloaina lava lea ma faatino lona alofa mutimutivale (*compassion*) ua a'oa'oina ai tatou.

ILOAINA O IESU

O le soifua auuana o tagata ua faapaiaina e le Atua, e faatino ai le mea moni ma le tautua faamaoni; e lavatia ai faigata o le ola faasoo; ma fesoasoani ai mo le tagata mafatia; ma tumau i le faatuatua e ui i luitau o le ola molimau. O ata vaaia ia o le tagata e faalagolago i le taitaiga a le Agaga Paia o le Atua, ma le mafana ma le vava lalata o sootaga ma le Atua, e ala i le auuana mo Ia ma Lona finagalo.

Le mamalu e, o lenei Fono Tele ma le EFKS Aoa, mai ona ao seia oo i ona i'u, amuia i tatou pe afai o lea le tulaga o la ta molimau. A e afai e le o faatasi le futia ma le umele, ua faamanatu mai le feau o lenei taeao ia Peteru ma lona valaauina, e faamalosi mo i tatou. O Peteru le soo na ia faafitia lona Alii ma tauto na te le iloaina o Ia; le soo na sola ese ma le fefe ina nei mea ane ua afaina foi o ia i le matau'a o pulega a malo o le lalolagi; le soo sa mafuta faatasi ma le Alii a o soifua o Ia, a e sa itiiti lona faatuatua i lona Matai.

Mai ia vaivaiga faaletagata, a e na liua Peteru e avea ma auuana loto tele ma se molimau malosi i le Keriso Toetu, ina ua faapaiaina e le mana o le Agaga Paia, e pei ona molimau le Tusi o Galuega. A o tulaga lelei ia o Peteru ua loa ona silafia e Iesu, a e lei talitonu ai Peteru i le la mafutaga, ona sa le'i maua'a lona faatuatua. O le pine faamau o lea manatu o loo ta'ua e le fai Evagelia o Ioane, ina ua poloai Iesu ia Peteru ia fafaga i ana mamoe (Ioa.21:15-19). Faatoa pupula mata o Peteru i lona valaauina ina ua ia mautinoa i le eseese o lona iloa faasoo, ma le finagalo o le Alii i le atina'eina o le galuega, e faatino i le alofa faaleAtua e fafaga ai tagata i le alofa o le Atua ma lana faaolataga mo tagata uma, a e le o le alofa faaletagata sa manatu ai Peteru, o le alofa e faasi'usi'u mata mo se tau, pe faapito ai manū ia tasi.

Sa silafia foi e Iesu, le tulaga taitai o Peteru, e pei o lana tautinoga faalefaatuatua, “O oe o le Keriso, o le Alo o le Atua soifua” (Mata.16:16) O Iesu, o le Mesia a le Atua! O Iesu, o le Atalii o le Tagata na vavae eseina ma faapaiaina e le Atua e togiola le lalolagi o tagata agasala! O Iesu Keriso, o le Atua lava sa liutino tagata ina ia faaola le lalolagi ia te Ia, ma ua toe afio a’e i le lagi ma o loo nofo i le itu taumatau o lona Tama e fautua mo tatou, a o tatou faatalitali i lona toe afio faalua mai! Le paia e, o lenei Fono Tele, o lea foi la ta molimau fa’auau.

Le Papa malosi lea - le Atua Tolu Tasi Paia, le Tama, le Alo ma le Agaga Paia - o le faavae mautu lea o le EFKS. Le talitonuga ua faamanuia i ai le Alii, ma ua Ia faapaiaina e faavae ma atia’e ai le Ekalesia, e ala i le soifua molimau i totonu o puapuaga o le ola auauna, e pei foi ona faata’ita’i mai le Alii i lona soifua, na Ia uia ai ala o le pologa (Fili.2:7). O lea le manulauti o le auaunaga faamaoni e le mafai e Seoli ona tineia, a o le ki ma le tatala i manuia o le Malo o le Atua, ina ua faapaiaina i tatou e lona Agaga Paia, tatou te molimau atu ai ma le loto tele i le sa’o, i upu moni, ma amioga tatau, e atia’e ai le Ekalesia a Keriso. O lo tatou iloaina lava lea o lo tatou Alii ma le Faaola o Iesu Keriso, ma lona finagalo ina ia ogatotonu i le folauga a le Ekalesia.

UPU FAAI’U

Malo faafetai i le tatou Ekalesia i le soifua tautua ma le tumau i le faatuatua, e ui i fita o le ala. A o se faamalosi mo lenei Fono Tele, ua faapaiaina ma faamanaina i tatou e le Agaga Paia o le Atua, tatou te ati a’e faatasi ai lana galuega ua tuuina mai. O tatou lava o sui vaaia o le Atua i le lalolagi, ma ia atagia le paia lea o le Atua i le auaunaga o loo fai. Ia manatua foi, a leai le Atua e paia ma Le e ou le mana uma lava, e leai foi se mana po o se malosi, a o se paia ma se mamalu, tatou te faatino ai le ola auauna i le Atua.

Ia faamanuia le Atua i lau afioga le Taitaifono ma le Laulauafono o le Fono Tele, ia manuia usufono uma faapea le tapuaiga. Ia manuia foi taualumaga uma o le Fono Tele o lenei tausaga i le mafuta mai o le Agaga Paia o le Atua.

Ma le fa’aalolao tele e tatau ai. Soifua ma ia manuia.

Saunia susuga Dr. Visesio Saga FS,
Faifeau Faiaoga Kolisi Faafaifeau Malua.

PEPA FONO TUPULAGA

IA FAI MA AUAUNA E FINAUMO LE FAATUATUA (IUTA 1-25)

1. FOLASAGA:

O lenei Pepa ua fa’aautuina faapea, ‘IA FAI MA AUAUNA E FINAUMO LE FAATUATUA.’ O lenei lalolagi o loo outou soifua ma ou ola ai, o le lalolagi o loo finau ai pea le lelei ma le leaga, i le upu moni ma le taufaasese. O le lalolagi o le mau talaiga eseese. Ma e i ai le talitonuga, e aafia gofie ai lava le soifua o tupulaga talavou, ma oo atu ai lava i le malaia. O le faamoemoe la o lenei Pepa, o loo taumafai e faamalamalama le taua o le feau a **Iuta** ma ana a’oa’oga mo tupulaga talavou. I le faatusatusaina o lu’itau sa feagai ai ma i latou na ave i ai le Tusi, ma luitau o i ai tupulaga a le Ekalesia i ona po nei. Ma se’i saili po o le a se feau taua e faamalosi ai Tupulaga Talavou a le Ekalesia i Samoa nei ma Atunuu e mamao e tautua ma ola ai totonu o le Ekalesia.

Contextual Background (Siosiomaga o le Tusi)

O Iuta, o lea o loo molimau ai le Tusi Paia, “o le auauna a Iesu Keriso, o le uso foi a Iakopo” Iuta 1. O loo faamauiina foi i le Evagelia a Mataio 13, “55 e le o le atalii ea lenei o le tufuga? E le o Maria ea le igoa o lona tina, o ona uso o Iakopo, Iosefa ma Simona ma Iuta?” E faapena foi le molimau a le aposetolo o Paulo i lana tusi ia Kalatia 1, “19 a e ma te lei feiloai ma se tasi o le au aposetolo, ua na o Iakopo le uso o le Alii.” Pe a fua la i mau nei, e ui ina fai mai o ia le auauna a Iesu, a e o ia lava o le uso tu ofe. O lona uiga, o le uso e fai ma auauna, e fai ma pologa e tautua ai lona uso. O le tagata ua ofoina atoa lona ola, e tautua ai mo lona aiga. O lona uiga, o le na tusia lenei Tusi, o le uso o Iesu ma Iakopo. Peitai e le o mautinoa po o le a tonu le aso na tusia ai lenei Tusi, a e talitonu nisi, na tusia i le faaiuga o le seneturi muamua, mai le va o le 60 - 80 TA (Tausaga Amulī).

O i latou sa ave i ai lenei Tusi, fai mai Iuta, “I e ua valaauina, ua alofaina e le Atua le Tama, ma leoleoina/tausia mo Iesu Keriso.” O lona uiga, o le valaau mo tagata uma o e talitonu i le faatuatua Kerisiano. E aofia ai Kerisiano Iutaia,

ma Kerisiano o nuu ese o e ua valaauina ma alofaina e le Atua, ua ola foi i le Tala Lelei ia Iesu Keriso, peitai o loo feagai ma luitau, ma faigata o talaiga pepelo, ma amioga lē mamā o loo i ai i totonu o le lotoifale o le ekalesia ma le sosaiete i lea vaitau. O le afuaga lea ma le faamoemoe na tusi ai e Iuta lenei Tusi, ina sei apoapoa'i ai i tagata Kerisiano uma, ina ia finau malosi ma le faatuatua, e tetee atu ai i a'oa'oga sesē ua fai ma sasa i le Ekalesia. Ona ua o atu faaleiloga i latou, e faasese le alofa tunoa o le Atua, ma tetee i le pule a Iesu Keriso.

2. SU'ESU'EGA ANOFALE O LE TUSI (Exegesis) Fuaiupu 1 - 4: Faatomuaga, Upu Faafeiloai, Faamoemoe o le Tusi.

I le amataga o le Tusi o loo i ai upu nei, “O Iuta, o le auauna a Iesu Keriso.” O le upu Eleni ua faaliliuina ai le upu 'auauna', o le doulos, e faamatalaina ai se tagata ua talia i le loto maualalo, ma le loto malie atoatoa le tuuina atu o ia e fai ma pologa a se matai. A tuu foi i le tulaga o le sosaiete, e tulaga tutusa le auauna po o le pologa, ma le seevae (se'i tulou). A o lea e saafi ai Iuta i uluai upu o lana Tusi, o ia lava o le auauna a lona uso, e ofoina atu atoa lona ola e tautua ai sei toe faailoa ma faamanatu le Tala Lelei ia Iesu Keriso i e ua ta'ua, “o e ua valaauina”.

O i latou “o e ua valaauina, ma e ua alofagia e le Atua le Tama”, o i latou ia ua i ai lo latou faiā faapitoa, ua valaauina ma ua mauaina lona alofa, ma ua “tausia mo Iesu Keriso”, o loo ta'u mai ai le tulaga saogalemu ma le leoleoina lelei e le mana ma le alofa tunoa o le Atua, o lo latou soifua auauna. O lona uiga, o le valaauina o le tagata Kerisiano, o ia o le auauna a Iesu Keriso, ua i ai le faiā faapitoa ma le Atua e ala i le alofa, e leoleoina lelei le ola i aao o Iesu Keriso.

I se vaega o le fuaiupu e 3 o loo faapea mai, “*Le au pele e, ua ou tusi atu ia te outou, ia outou faamalolosi ona finau mo le faatuatua...*” O i o loo taoto ai le faamoemoe o le Tusi. Fai mai Iuta, “*Le au pele e,*” o upu o lagona, faamatalaina ai lagona o le alofa faatamā i lana fanau, o le alofa

faatamā lea o Iuta na iloa ai le manatu mamafa i lona valaauina. O le Tamā alofa i le Ekalesia, ua ia faamanatu ia finau mo le faatuatua. O le upu 'finau' i le gagana Eleni, o loo faamatala ai, 'ia finau malosi' po o le 'tau ma tauivi malosi'. O lona uiga, e le na o se finau ma tauivi, a e ia matua tuu atoa i ai le atoatoa e finau ai mo le faatuatua, e tetee atu ai i a'oa'oga pepelo o loo sese ai le faavae o le faatuatua o le Ekalesia.

O lona uiga, o lē ua valaauina e fai ma auauna a Iesu Keriso, o lona lea tiute tauave, ia matua tauivi ma finau mo le faatuatua i lou tagata atoa, ma lou malosi atoa, e tetee atu ai i a'oa'oga pepelo, a ē latou te faaseseina le alofa tunoa o le Atua, ma faaleaogaina le pule a Iesu Keriso ma le Ekalesia.

5 - 19: Lapataiga mai Tala faasolopito o le Feagaiga Tuai, ma uiga o faiaoga taufaasese.

I le fuaiupu 5-19, o le ata manino o faataitaiga o nei aoaoga pepelo ma le ola tetee i le Atua, ma lo latou tau. Ua fa'aaogaina ai e Iuta tala faasolopito mai le Feagaiga Tuai, ma lapataiga faavaloga e faamatala ai i le au faitau le ogaoga o ia tu ma aga lē amio Atua. Muamua, o le o ese mai ai i Aikupito o le fanauga Isaraelu ma le faaumatia ai o i latou ua leai se faatuatua ma tetee i le Atua, o le ata manino o le i'uga e oo i ai le tagata ola lē ususitai ma lē faalogo i le Atua. Ua ia faatusaina foi le fouvalega a nisi o agelu o ta'ua i le Tusi Paia, ma le agasala a Sotoma ma Komoro ma latou gaioiga sa fai, o le amio leaga, o le upu leaga, ma le tetee i le pule a le Atua. O faamatalaga foi faavaloga, na ta'usalaina ai e Iuta nei tagata, o ni tagata e mata'utia le ola faa'ole'ole, ma le taufaasese i le Atua. Ma ia faatusaina ai nei aoaoga pepelo, ua pei o se mea e feleleina i matagi, e le o i ai se vai, o laau ua malili o latou lau, ua lē fua, ua mate, ua liaina lava. O le uiga i le manatu o le tusitala, e leai a ma se uiga, e leai se faamoemoe, e leai foi se ola e maua ai i nei a'oa'oga pepelo, e na o le mate ai ma fetafeaina le ola i faafitauli o le olaga, ma oo ai lava i le malaia. Lea foi sa faalautele ai e Iuta e ala i le fa'aaogaina o le valoaga a Enoka, ma

valoaga a le au aposetolo, na valoia ai le oo mai o le faamasinoga i e lē amio Atua, o e ua amio faaletino, ua le i ai le Agaga, ma e faatauemu i aso e gata ai. O le ala lea na ia toe faamanatu ai, ina ia manatua a’oa’oga a le au aposetolo ma ia mataala pea e tetee atu i talaiga ma a’oa’oga sese ia, ma ia toe faamamafa ai le taua o le iloiloina o mea moni i le faatuatuaga i le alofa tunoa o le Atua, ma le pule a Iesu Keriso.

20 - 25: Faatonuga mo tagata faatuatua uma, ma Upu Faai’u.

I le fuaiupu 20, o loo i ai le upu ‘*atia’e*’ a o le ‘*atia’e*’ i le gagana Eleni, o le veape o loo fa’aaogaina e fai ma upu apoapoa’i i le aufaitau ina ia punoua’i e ati a’e i latou lava i lo latou faatuatuaga, ma ia faamamafaina ai le manaomia o le tuputupu pea o le ola faaleagaga i lea faatuatuaga, e ala i le tatalo i le Agaga Paia. O lona uiga, o le ati a’e o le Ekalesia ma le faatuatuaga o le tagata Kerisiano, e faalagolago i le taitaiga ma le musumusuga o le Agaga o le Atua e ala i le tatalo. Ua ia faatonuina foi i latou ina ia tausia le alofa o le Atua; o le upu ‘*tausia*’ i le gagana Eleni, e uiga tutusa ma le upu ‘*leoleo*’. Ua faamanatu e le tusitala lenei alofa, ina ia fai ma poloaiga e tausia, ma leoleo ai i le uso a Kerisiano mai le afi o le leaga o le ola tetee i le Atua. O upu faaii a Iuta, ia foi le viiga ma le faamanū i le Atua. E faailoa ai le alofa laveai o le Atua na te taofia ai tagata talitonu mai le tautevateva i faiga a le tiapolo, ma tuuina atu i latou e le pona i Lona malo e faavavau.

3. FAATATAU (Application)

Le mafutaga tupulaga talavou a le Ekalesia i lenei tausaga, IAFAIOUTOU MAAUAUNAE FINAU MO LE FAATUATUA. Auā o outou o le lumanai o le Ekalesia ma le Tala Lelei mo nei ma i e luā. O le mea moni ua tatou ola i totonu o suiga ua i ai le lalolagi i ona po nei, o suiga lava e tauivi ai pea le lelei ma le leaga, o le upu moni ma upu taufaasesē. Ma ua faataaloga ai i vai le soifua ma le ola, ua pule ai le tagata i lana lava ia faataatau.

O luga foi o upega tafailagi, ua le gata ina tele le taufaavalea, ma le taufaasesē i mea o le lalolagi, a e ua oo lava i le Tusi Paia ma le Tala Lelei ia Iesu Keriso. Ua fefinaua’i nisi tagata faitau Tusi Paia ma le aufaigaluega, sei saili le tapuaiga ma le faatuatuaga moni, ma oo ai lava ina fesiligia le moni ma le faamaoni o Afioga Paia a le Atua.

Ua tele foi mea faatosina, ma mea faafiafia eseese, o upu suamalie ma le manaia i le faalogo, e tosina ai le loto ma le mafaufau, ma ua fetosoa’iina ai mafaufau ma lagona o tupulaga i nei aso. Fai mai Iuta, o mea taufaasesē na e o atu ai faaleiloga, o mea e faaleleaina i le matagi, e pei foi o le laau ua malili ona lau ma ua lē fua, ua mate. O lona uiga, e leai sona toe aoga i le ola.

Tupulaga talavou o le EFKS i Samoa ma atunuu e mamao, ia outou mataala ma tumau i le ola ia Keriso. Auā o outou o auauna a Iesu, e ofoina lou faatauvaava e tautua ai e tala’i le Tala Lelei mo soo se tasi ua alofa i le Atua, ua i ai lou faiā faapitoa ma le Atua, e ala i le alofa, ua leoleoina lelei foi lo outou ola i aao o Iesu Keriso. E te tauivi ma finaufinau ai mo le faatuatua, e tetee atu ai i ia talaiga pepelo, ma mea taufaasesē, e maumau ai le ola.

Fai mai le manatu autu o le Fono Tele, ‘FAAMANAINAE LE AGAGA PAIA, E ATIA’E LE EKALLESIA A KERISO.’ A e fai mai Iuta, ia outou ati a’e lo outou lava faatuatuaga ma le Ekalesia a Keriso. E ati a’e faapefea? Ia ati a’e e ala i le faalagolago i le Agaga Paia, i le tatalo. I le ma le faamoemoe, ia tupu pea ma ola lea faatuatuaga e faavavau. Ia fai ma auauna e finau mo le faatuatua.

Ia manuia tele le Fono Aoa o Tupulaga Talavou, faapea le Fono Tele a le Ekalesia i lenei tausaga. Ia manuia le Laulau o le Fono Tele, le Komiti a le Au Toeaina, o laulauafono ma le nofo a Komiti, o usufono ma le tapuaiga a le Ekalesia. Se upu ua sala alofa faamagalo le auauna faatauvaava.

Soifua ma ia manuia. Faia ma le fa’aaloalo tele.

Saunia susuga Paie Tapu Legalo AM,

Ofisa Lotofaga Lepa Aleipata,

Matagaluega Aoaoga Kerisiano.

O LE PEROFETA MULIMULI

(O le tala faafagogo ua faaSamoaia mai le tusi 'The Last Oracle' tusia e James Rollins.)

Na saunoa atu Api, “Na faamatala mai ia te i matou tala, na tuutuugutu faasolo mai tamā i le atalii, mai le tina i le afafine. E faasino i se taua tele na faia iinei. I le afe tausaga talu ai. Na ta’ua ai le maua mai e o matou tua’ā o lenei nofoaga sa faatumulia i ponaivi. Ma o se fa’aaloalo i e na maliliu, na matou faaputupu ai i toega o latou tino ma teu i totonu o nei malumalu.” Na ia faasino i le faa’ofu’ofu i fafo. “O loo tele nisi ponaivi i fafo atu.”

Na liliu ese Karai mai le potu. Na maua mai e se tasi nei tagata ma na faaumatia i latou. Na ia manatua le upu faagagana a Api i tua atu.

O nei puipui e lē mafai ona mautinoa ai se saogalemu. E lē faavavau.

O le i’uga na oo i ai tagata sa uluai nofoia lenei nofoaga, o se lapataiga lea i tagata o le aiga ma le nuu o Api. O se nofoaga lelei e lalafi ai, a e lē mafai e se tasi ona sola ese mai le lalolagi e faavavau.

Na laa atu Karai agai i le isi mea mataiga e ese ai i totonu o le potu.

E pei ona faailoa i le fausaga o le malumalu, o lenei vaaiga sa iloa foi i luga o le tupe siliva.

Na savali atu Karai i le puipui i tua ma faasusulu atu lana moli uila i ona laualuga. O le puipui o mapu lanu kulimi sa faafilogia i maa uliuli talatala, na fausia ai se faailoga iloa gofie, na tulai a’e i le luasefulu futu.

“O se uili sakara,” na fai atu ai Elisapeta, na matuai ofo ma le fefe. Na ia tuu ane i fafo lana meapu’eata ma amata tapu’e ana ata. “E pei o le isi itu o le tupe siliva.”

Na faasolosolo atu e Luka lona lima i luga o le puipui. Na pei e faitau e Karai ona mafaufauga. Pe mata o le faailoga anamua lenei sa fai ma punavai o le tagavai Romani?

Pe mata sa faapea foi se mafaufauga o Atipale Poleki?

Na mapuea Koualasaki, mautinoa lona lē fiafia i lenei potu. “O se faama’imau taimi.”

“O le a le uiga o lau tala?” Na ata atu ai Elisapeta. “O se sailiga tulaga ese lenei o le soifuaga, i suesuega faa’eliga laufanua ma le tulaga i tino ma toega o tagata.”

Na faamimigi tau’au o Koualasaki. “Ioe, a e a la? A o fea o i ai le tele o auro ma maa taua?”

Sa le’i faailoa e Karai, a e sa’o lelei Koualasaki. Na ia laa ese. Na faasusulu atu le moli faataamilo i le potu atoa. E i ai se mea o loo misi, a e le o ni auro ma maa taua.

Na faatasi atu Rosauo i le mea sa i ai o ia. “O le a le mea ua tupu?”

“E i ai le mea lea e lē o i ai iinei,” na memumemu ai Karai.

Na lagona atu o ia e isi i totonu o le potu. Na latou taufai pupula atu ia te ia.

Na toe faataamilo e Karai le susulu a le moli uila. “O luga o le tupe...sa i ai le faailoga E? Le mataitusi Eleni o le epialona.”

“E sa’o lelei Karai,” o Elisapeta lea. Na soloi ese e Karai tulutulu o le timu mai ona foliga. “O mea uma o i luga o le tupe o loo iinei – le fausaga o le malumalu, le uila sakara – o fea la le mataitusi Eleni?”

“Ua na o se mea itiiti,” o Matesone lea. “O le a lona afaina?”

“E le o se mea itiiti,” na finau atu ai Elisapeta.

“E i ai le tagata na ia matuai faasaga ifo e fausia faatutusa lelei le malumalu i Talefaia. O mea na tatou vaaia i fafo.. o le malumalu i ona itu fesaga’i o foliga na o le maota o tupe o Talefaia, o vaega lapotopoto o le malumalu o ni foliga tutusa lelei ma le maota na gaosia e tapuai ai ia Atenai i Talefaia. Ma le nofoaga lenei. O fafo ma totonu o loo atagia ai foliga uma lava o le malumalu o le Perofeta. Ma o le mataitusi o le E o se tasi o ona vaega mataina na teuteuina ai.”

Na manatua e Karai le laua talanoaga ma Penita, e uiga i le E faaTalefaia, ma lona tuputupu a’e e avea ma faailoga o se ituaiga o perofetaga, o se gagana faailoga lauiloa i le tala faasolopito o faatufugaga ma fausaga.

Na laa atu i luma Luka. “Ou te iloa foi sina mea e uiga i lenei mataitusi.”

Na faaliu atu Karai i le ta’ita’i o le aiga Kipisi.

“Na ou fai atu ia te outou i tamaiti na gaoia mai ia i matou,” na ia fai atu ai. “O matou tagata na muamua tau atu i le apitaga o fasiotiga tagata, na latou ta’ua se malumalu fausia i maa. O le faitoto’a sa matala, a e na maua ai i luga o ona toega malepelepe se mataitusi E apamemea. E leai se tasi na ia iloa lona uiga. Na o le pau tagata na

latou silafia lona uiga, na fasiotia ma tanumia faatasi ai i le tuugamau lautele. Na tanumia faatasi ai le misiterio lilo ma i latou. Atonu o le E lava lea e tasi?”

O le faailogaina o le au koviani, na manatu ai Karai. O le au faitau lumanai o Kipisi. Se tasi o lotu faavaloaga o perofetaga.

“Lelei mea uma,” na fai atu Matesone, e manino ua lē lava foi o ia. “A e o le a le mea o i ai pe afai e misi le E iinei?”

“Atonu e leai se afaina,” na tautino ai Karai, peitai na ia fai atu lena upu aunoa ma sona talitonuga. Na ia faliu atu ia Api. “O anafea na e uluai faasino ai ia Fomai Poleki le nofoaga lenei?”

Na ia faamimigi. “Na ou aumaia Fomai Poleki iinei mo le uluai taimi i le tausaga talu ai. Na ia vaavaai solo, tusi i lalo ana tala, ma toe foi.”

Na manu’a le pupula o mata o Elisapeta. “Na te le’i ta’u maia ia te a’u se tala o ana sailiiliga o le nofoaga nei.”

“Leaga sa ia fa’aaloogia a matou mea lilo,” na ma’ ai le fai atu a Api. “O ia o se tagata lelei.”

Na iloilo e Karai foliga oona o Matesone. I le amataga na te’i ai ma ofo le polofesa i nei sailiga, a e mulimuli ane ua te’a malie ese le maofa, ma na maua ai se aogā itiiti lava mo lana ia suesuega, ma tau uma atu ai lona naunautaiga. Pe mata sa faapea foi le lagona na oo i ai Fomai Poleki? O le sailiga faatalafaasolopito lava ia e matagofie ma taua, a e peitai ona sa le’i fesootai lelei ma lana mataupu faapitoa, o le ala lea na ia fa’aaloogia ai le misiterio o le akuta, ma na ia gūgū ai.

Pe afai o lea, aiseā le faafuasei ona faanatinati lona fia sau iinei, a e le’i leiloa o ia? Atonu na ia maua se fesootaiga fou, se mea e fetau lelei ma lana sailiiliga.

Na fesili atu Karai ia Api, “Sa i ai se mea na faaosofia Fomai Poleki e faafuase’i ai lona manao e sau iinei? Se mea tulaga ese pe fou e oo mai i lena aso?”

Na lūlū le ulu o le tamaloa. “Na sau e asiasi mai i le nuu. E pei ona sa ia faia i le tele o isi aso e tele. Sa matou talanoa e uiga i se faiga palota na lata i lena vaitaimi, e filifili ai se sui akuta mo le tofi pulenuu. Na ou maua se tupe siliva fou ma faasino ia te ia, a e na ia fesili mai i le tupe sa i ai le ata o le malumalu e toe fia vaai i ai. Na ia vaavaai i ai aunoa ma se ano i ai, sa ia faataavili foi le tupe i luga o le laulau. Ona faafuase’i lava

lea ona pupula vatele ona mata ma oso tu i luga. Na faafuasei ai lava ona ia manao e sau loa iinei, a e peitai ona o a’u sa tuatuagia i le palota. Na ou fai i ai e faatali se’i ou foi atu...”

Na toso faai’u ifo lona leo, a e toe laga a’e e Elisapeta. “O lo’u tamā sa le’i lauiloa i lona onosa’i.”

Na lue mai Matesone. “O le aso lena na ou maua ai le telefoni faanatinati mai ia te ia. Na ia finau mai ua i ai se mea ua ia maua, o se mea na te luluina lo tatou talitonuga faasino i le mafaufau o le tagata, i le taimi e faalauiloa ai.”

Ina ua taia le mafaufau o Karai i se manatu, na ia toe foi ai ia Rosauro. “Se’i toe aumai lava le tupe lena ia te a’u!”

Na ia togi atu i ai.

Na iloilo e Karai le tupe: o le malumalu i le tasi itu, ma le uili sakara i le isi. “Elisapeta, na e fai mai foi, na e maua le galuega lena i Telefaia ina ia mafai ai ona fai au suesuega e fesootai ma ana foi sailiga. O le a le mea na e ta’u i ai i le faaiuga, e uiga i le tala faasolopito o Telefaia?”

“Na o tala masani lava,” na ia fai atu ai. “E itiiti lona fia iloa o le tala faasolopito, a e sili atu i le mauaina o kasa efilini i tala ane o le malumalu. O lo’u tamā sa sili ona naunau i faamatalaga auiliili i le faiga o tapuaiga a le Perofeta, na toe vaavaai atili i lagolago faasaikolosi mo lona mana faalemafaufau.”

“Pe afai la sa le’i naunau o ia i le tala faasolopito, o anafea na ia iloa ai le taua o le mataitusi faa-Eleni o le epialona?”

“Na ou lafo i ai se Pepa e uiga i le mataupu lena.” “O anafea?”

“Tusa o le masina a e le’i – “ Na faafuase’i ona lautetele ona mata.

Na lue atu Karai. Na ia tootuli i luga o le fola mapu ma faataatia i lalo lana moli uila. Na ia tago atu i le tupe ma faatu i luga o lona itu, ona filiki lea ma tuu atu e taavili i luga o le fola, o suluia i le susulu o le moliuila.

Na ia punou i lalo ma iloilo le taavili.

O le taaviliga o le tupe na fausia ai se vaaiga o se kelope lanu siliva. O le E, faatulaga i le ogatotonu o le tupe, ua tula’i mai nei i le ogatotonu o le kelope taavili. Na lagona e Karai lona uiga loloto faatusa. Na fai mai Penita o le E atonu e i ai ona a’a faavae i uluai tapuaiga i le Tina Lalolagi, o Gaia. O lenei ua taatia i le ogatotonu o le li’o siliva, e pei o Gaia lava ia i totonu o le

lalolagi faitino. A o le mataitusi foi na te fai ma sui o le agavaa faalemafauo o le tagata, e ea a'e mai le ogatotonu o le tino o le tagata, i fafo mai o lona fai'ai.

Na tuu e Karai lona mafaufau ia malolo, ia saili tonu le uiga.

O le a le mea na iloa e Atipale Poleki?

Na taavili le tupe, o se misiterio lanu siliva, o loo natia ai se mea lilo mai anamuā.

A o le ā – ?

Ona iloa lea e Karai.

Na ia aapa atu, ma po ifo le tupe faamafolafola agai i le fola mapu.

Ioe!

(soso'o atu Sulu Samoa Iuni 2024)

NA O AFIOGA...

FAAMAMALU LE SUAFA O LE ATUA

“28 Ia faafetaia le Atua o Sataraka, Mesako ma Apeteniko...” Tanielu 3.

E i ai taimi e tatau ai ona tatou lototetele e faafetaia'i lo tatou fefe ma le pala'ai, a e tula'i atu e finau ma tau mo le mea tatou te iloa e moni ma sa'o. O le mea lena na fai e Sataraka, Mesako ma Apeteniko. O lo latou lē ifo i le tupua a le tupu o Nepukanesa, o lo latou filifili lava lea ma ua malilie e oti mo le mea moni ma le mea sa'o na latou talitonu i ai. Atonu e mafai ona latou fetuutuuna'i muniao e pei o lea upu a le atunuu, ma faapea ane, “Tatou ifo pea i ai i o tatou tino i fafo, a e tatou te lē ifo i ai o tatou loto ma agaga i totonu.” Pe faapea ane foi, “Tatou faatagā ifo, a e mafaufau o le Alii le Atua o loo tatou ifo i ai.” Ma nisi lava faanoi e ufiufi ai le palaai, ma ifo ai lava ona o le fefe i le oti. Peitai sa le'i faapea lenei to'atolu. Na latou tulai atu ma le loto tele, e finau ma tete'e i le mea pepelo ma le faapaupau, a e tula'i atu e tau mo le mea moni ma le mea sa'o. Ma latou faatulagaina ai se vavega ofoofogia. *“24 Ona matua ofo ai lea o Nepukanesa le tupu, ua vave ona tula'i, ua fai atu, ua faapea atu i ana tulafale, Pe na tatou le lafoina ea tagata e toatolu o fusifusia i totonu o le afi? Ua tali mai i latou, ua faapea mai i le tupu, Le tupu e, sa faapea lava. 25 Ua tali atu o ia, ua faapea atu, Faauta, ua ou iloa tagata e toafa, ua tatalaina, ua feoa'i i totonu o le afi, ua le afaina lava i latou; ua tino mai lona toafa, ua pei o se alo o le Atua.”*

Pe afai e te tuu lou ola i se tulaga e lē mapuipua, ona e fausia lea o se tulaga e afio ifo i ai le Atua ma na faia vavega e laveai ai oe. Peitai, pe ana fai e ifo Sataraka, Mesako ma Apeteniko i le tupua a Nepukanesa, o mea nei mata e tutupu, pe lē tutupu foi:

(i). Latou te lē maua le siitia o latou tulaga i totonu o le malo.

(ii) E lē maua e tagata sa Iutā le puipuiga saogalemu a le malo a o latou i ai i totonu o Papelonia.

(iii) O le a fa'aauau pea le tapuaiga i tupua faapaupau i totonu o le malo sa latou nonofo ai.

(iv) E lē maua e le taitai o le malo se suiga lelei o lona olaga, e ala i lona talitonu i le Atua.

“28 Ua fai atu Nepukanesa, ua faapea atu, Ia faafetaia le Atua o Sataraka, Mesako ma Apeteniko, o lē na auina mai lana agelu, ua lavea'iina ai ana auauna e na faatuatua ia te Ia, ua liliuina foi le upu a le tupu, ma ua latou tuuina atu o latou tino ina ne'i latou auauna ma ifo i se tasi atua, tau lava o lo latou Atua... 30 Ona tomai lea o Sataraka, Mesako ma Apeteniko i le itu malo o Papelonia, i le pule a le tupu.”

Pe afai e te fa'aaloogia le Atua ma faamamaluina lona suafa i le aso nei ma aso uma, o lou tuu atu lava lea o oe ina ia fa'aaloogia ma faamanuiaina mai e Ia.

O OE SE UŌ MAMAE?

“17 E alofa le uō i aso uma lava, ...” Faata. 17.

E i ai le talasua masani, i se uō e toalua na malaga savavali i le auala i se tasi aso, a e faafuase'i ona osofa'ia e se urosa. Na muamua iloa atu e le tasi alii, ona tamo'e lea i le laau na tu lata ane, ua a'e vave ai i luga i ona lālā ma lafi ai. O le isi alii sa tuai ona ia iloa atu le urosa, ua tuai ona tamo'e e a'e i se laau, ona ia taatia ifo lea i lalo ua faatagā oti ai. Na ia iloa mai tala a isi tagata, o le auala lea e togafiti ai le urosa pe a fetai'a'i ma le manu, auā e lē tagofia e le urosa se manu ua mate po o se tagata ua oti. Sa faapea foi ona alu ane le urosa lea ma sogisogi solo i le tino o le alii lenei e oo i ona foliga, e peisea'i o loo musumusumu atu se upu i lona taliga. A o le tagata

ua malō faasasa’o ua lē toe mānava, ua pei lava ua oti moni. Ma sa faapena lava ona talitonu ai le urosa ma alu ese loa. Ina ua saogalemua le auala, ona toe alu ifo lea i lalo o lea sa a’e i le laau. Na ofo o ia i le mea na tupu, ma fesili ai i lana uō pe se ā le tala a le urosa na fai atu ia te ia a o taoto i le auala. Na tali atu lana uō, ‘Na fai mai le urosa, ia ‘aua ne’i o’u toe faauō ma malaga faatasi ma se uō e sola a e tia’i a’u i taimi o faalavelave ma puapuaga!’

E faigofie ona faauō ma se tagata ua manuia lona olaga, na te maua uma mea e tatau mo aso taitasi. Tatou te fīafīa i ai, e faauō ma latalata i ai i aso uma. Peita’i, e faapefea pe afai e faafuase’i ona pa’ū o ia? Pe afai e toilalo ma tupu ai se faalavelave ua afaina ai lona tulaga manuia sa i ai? Pe afai ua leiloa pei o se mamoe ua sē, ua mamao ese lona ola ma Keriso? Ua sui mai le lelei i le fai o mea valea ma mea leaga e ta’uvalea ma inosia? Tatou te fīa uō pea i ai, pe lafoa’i ma alu ese mai ai? Fai mai le Tusi Paia, “*E alofa le uo i aso uma lava.*” O le uo e alofa, pe afai e te i le tulaga maualuga, latou te lē lotoleaga, pe afai foi e te alu ifo i lalo, latou te lē faatausuai. Latou te agalelei ma amanaia mai, tusa lava pe e te lē faia atu faapea. Fai mai le tasi tusitala o Elbert Hubbard, ‘O lau uō, o le alii (po o le tamaitai) lena, na te iloa lelei oe a e alofa pea ia te oe.’ Pe afai e i ai sau uō faapena, ia e faapelepele i ai ma ta’u i ai lou fīafīa ma le faafetai i lona faiuō faamaoni lelei.

O la Iesu i ona soo, “*13 E lē sili lava le alofa o se tasi i lenei alofa, ia tuuina atu e se tasi lona ola mo ana uō. 14 O a’u uō outou... 15 Ou te lē toe ta’ua outou o auauna... a ua ou ta’ua outou o uō, auā ua ou faailoa atu ia te outou mea uma...*” Ioa.15. O lana folafolaga lava lea mo i tatou uma o e mulimuli ma le faatuatua ia te Ia, ma fai Lona finagalo. O Ia le uo mamae ma le faamaoni lona alofa ia i tatou uma, i aso uma, pe tatou te faamaoni pe leai. O le faamaoniga o lona alofa moni, na tuuina atu ai e Ia lona ola mo i tatou uma, e ala i lona alu a’e i luga o le laau mataga o le satauro, na tautau ai a o sisina ma tafetoto lona tino momomo na sasa, tu’itu’i ona aao i fao, tutu’i lona itu i le tao, faapale lona ao i le pale tuitui. *E alofa le uo i aso uma lava.*

O LE ATUA O MEA NINI’I

“*6 Ona vavae mai ai lea e ia o se laau, ua lafo atu i ai; ona opeopea ai lea o le uamea.*” 2 Tupu 6.

O loo faamatalaina i le 2 Tupu 6 le tala i le perofeta o Elisaia ma ona soo na latou ta laau i autafa o le vaitafe o Ioritana. Na ta e le tasi soo lana laau, a e faafuase’i ai ona pa’ū ifo le matau (to’i) i totonu o le vai. Ona ia valaau lea ia Elisaia, “*5 Auē! Le alii e; auā o le mea (sa) nonō (it was borrowed).*” O loo tautala le soo ma na fa’aaogā le taimi tuana’i (sa nonō). E tusa ma lona iloa, o le matau ua leiloa atu e lē toe maua mai e faavavau. E leai ma sona manatu e toe maua mai. Na fesili Elisaia po o fea na pa’ū i ai, ona ia faasino lea o le pito tonu o le vai na leiloa ai. Ona tago lea o Elisaia ua fati mai se lālā laau, ua lafo atu i le vai, ma tula’i mai ai se mea ofoofogia sa le’i tupu muamua pe na toe tupu mulimuli ane – ua opeopea le matau! Ua fai atu foi le perofeta i le soo, ina ia ave a’e i luga le matau. Ona aapa atu lea o lona lima ma tago i ai ma ava’e i luga. Ia maitau lelei, o lenei mea na tupu e lē o se faalavelave sa lamatia ai se ola o se tasi. E moni o le matau sa nonō. E moni sa leiloa. Peitai afai o le mea aupito leaga lena na oo ia te oe, ona iloa lea e fai lava sina malepelepe o le soifuaga sa e ui mai ai.

E mafai ona faatulaga le vavega lenei e tutusa ma le vavega muamua a Iesu, lea na fai i Kana Kalilaia, na Ia liua ai le vai e fai ma uaina. Aiseā na maumau ai le uluai vavega i le fesoasoani atu i ni tagata lē lava tapena, ina ia ‘alofia ai lo latou masiasi ma ta’uvalea? O iinei e faailoa mai ai se isi upu moni faasino i le Atua. E amana’ia e le Atua mea nini’i ma faatauvaa, e pei o ‘aiga o faaipoipoga ma matau nonō e leiloloa i le vai. E leai se mea e telē i lo tatou Atua, e leai foi se mea e itiiti ia te Ia. “*7 Ia tuuina atu ia te Ia mea uma tou te popole ai, auā o loo manatu mai o Ia ia te outou.*” 1 Pete.5. O a uma mea o loo fai ma faafatiamata’i – mea tetele ma nini’i – ia tuu atu uma i le tatalo i le Atua le Tama alofa; auā afai e tāua ia te oe, e tāua foi ia te Ia. “*6 Ia e manatua o Ia i ou ala uma, ona faatonuina ai lea e Ia lava ou ala.*” Faasoa atu ia te Ia auiliiliga o ou popolega ma vaivaiga; ua uma na Ia ta le laau, e toe maua ai oe.

NISI O LE AU FAAU'U FAIFEAU SAMOA 2024



LOIA KOLIA FS & EASTERAKESA



KAPENI MATATIA FS & RENOLLA



NIUTUIATUA ONESEMO FS & CECILIA



KEREVETA TIUMALU FS & FAANAITAUA



TAVITAREUPENA FS & LOGOSAU



ISAAKO JR IOSE FS & ALICE